

粵西叢載

清汪森編

第四冊

進步書局校印

粵西叢載卷十二

僧惠能

清汪森編

惠能禪師。唐武則天朝說法講經。於永寧州南雙瑞嶺。永福知縣至永寧叩其行止。答曰。僧修於此。不知花甲。但覺時寒時暑。草木盛而後衰。惟記入山之年。乃某年某月也。縣官數其歲次。已四十年矣。武后徵召不赴。後往曹溪。世稱六祖。通志

白鹿禪師

白鹿禪師。桂人。姓張。名元康。襁褓已能合掌趺坐。長祝髮龍泉寺。嘗歸省親。登陽龍山頂。樂之。自號陽龍野人。延和間。住京兆大興寺。開元初。明皇幸安國寺。召利涉法師修經。時緇徒雲集。敕內侍諭眾。有明上乘者。闡揚無隱。師前奏曰。臣願演玄旨。命與利涉對問。旨意詳明。明皇嘉歎。賜住持安國寺。明年。駕復幸。時集沙門凡五百人。以外國所貢白鹿示之。鹿到師前。跪伏。遂以鹿賜之。號白鹿大師。開元末。丐嶺復居陽龍。大興佛刹。名其寺曰白鹿。桂林府志

全真

寂照大師。俗姓周。名全真。郴州人。幼有神悟。七歲就外傳。授書命讀。師問傳這是甚麼。傳未即答。師曰。天以此高覆地。以此厚載人。以此成聖賢。豈空空叫我讀來。識此之乎者也。便了。傳訝曰。非常兒也。年十六。詣郴州城北開元寺。剃落受戒。杖策至吳。徑山。參道欽禪師。數載得安樂法。徑山稱曰。有物先天地。無形本寂寥。能為萬象主。不逐四時周。吾知汝所到矣。天寶戊子冬。徑山奉召游京師。師隨侍。帝御朝元閣。羽士有史華者。希專寵。奏與釋氏角法華於東門觀。架刀為梯。登躡而上。如履磴道。師亦於本寺庭樹間為梯。較東門增高百尺。鋒刃鋤白如霜。師跣足躍身上下。若踏平地。以至沫沸油浴。烈鐵餐鐵嚼釘為戲。了無難色。羽流駭汗。掩袂而走。帝大嘉悅。尋遂山拜辭。徑山之羅浮國。徑山曰。子緣在南荒。試溯湘游。師旋郴省母。及里門。鄰婦呼其乳名。師笑謝曰。得道不歸程。歸程覺有情。江邊逢老嫗。呼我舊時名。入見母。殺雞為素食。師不忍却盡噉之。母食其一跽。師食竟。趨至江畔。出腸洗之。有獨足雞。浮水面焉。郴人建刹香山留師。師結靜室牛嶺下。初周源山有怪人。網人而食。師至其家。其母請避。無何怪人歸。輒舉網向師。師以袈裟覆之。怪人伏不能起。哀求歸鄉。師摩頂長其喙。怪人竟從為侍者。師過衡山雁峰寺。寺僧不容止宿。師曰。既不止。

宿可借行僮。眾嗤之曰：行僮難覓。要泥塑金剛。吾當奉送。師曰：不難以手指其一偈。曰：摩尼瓦礫混塵埃。多眼何曾識得來。昨日西方音信至。彌陀不在九蓮臺。倏然金剛倒地。一健僮荷簷從師而去。眾大訝追之。及渡。跪泣曰：肉眼不識活佛。願留回寺。師曰：五百年後。吾當歸雁峰。爾至德元載。至湘源。得湘山筍布臺。因卓錫焉。高僧從者甚眾。太和八年冬。有詔沙汰天下僧尼。師已豫知之。師一夕頂生肉髻。鬚髮併長。製衣曰：無量衣。冠曰：真空冠。入覆金山。結茅隱焉。宣宗即位。有詔除苛禁。復浮屠。相源之父老子弟苦旱三年矣。眾入覆金迎師出山。師擲錫東飛。正行間。甘澍踵之。連雨三日。四郊沾足。居城西淨土院。自此不易衣冠。不剃髭髮。自號無量壽主人。大中庚午夏。韋宙守永州。辦齋供佛。檄邑令促與夫。走迓師。師云：吾當自住。豈可以方外老人勞郵傳邪。使返命。途未及半。師已至。至則四門各見其一。守出郊迎。惟見其一。咸通八年丁亥二月十日。謂弟子曰：無色界天請吾說法。是夕坐化。時年一百六十有六。越八日。真相如坐。隨卜於筍布臺下。建院迎龕入焉。又踰二七日。夜頂放白毫。相光十一道。光中現十有一佛。如是者彌月。湘人奔走崇奉。有禱輒應。咸通庚寅。劉相公瞻謫驪州。乾符甲午。召還。駐節湘源。望山中紫雲迴翔。光遠有糧。詣院作禮。竭

緡一司。助修浮圖。乾符丙申二月。浮圖成。奉師出龕。歸塔藏之。宋元祐三年。又建今塔。成。歷二百二十有四載。開故塔。奉安佛座。出其真身。色相如故。遂以香泥塗飾。顯坐殿塔之下。元符三年。座生奇花。靈草。席地如繡。州以事聞。詔賜寂照大師。紹興五年。賜塔曰妙明。十四年。加慈佑寂照妙應普惠大師。嘗制法教十二部。每部十二卷。名曰無量經。五代間。經兵火。今存十二卷云。初湘源城在院西七里。晉天福丁酉。楚藩馬希範。以法師諱全真。又閱師利益經云。吾於應中。見清湘毫光輪。因是奏於朝。徙城於縣之東南。陞縣為州。命名曰全。置清湘縣附郭。全州志 湘山志

信天大師

信天大師。桂人。姓胡。名法壽。始出家為頭陀。無他能。惟飲油有施者。雖巨鉢引滿。無苦也。俗呼為喫油道者。語默不常。眾莫之測。時有中貴南使見而異之。還奏。僖宗詔詣京師。入見。不肯削髮。以為受之於親。不忍去。從之。忽云。天下將有叛者起。惟蜀可避。再奏不納。師乃自往。俄黃巢反。僖宗西狩。遂以為神。從駕還京。賜號鎮國。屢辭不受。復賜信天大師。桂林府志

道林

唐調露中。桂州人薛甲嘗供一僧法號道林。道德甚高。瞻敬尤切。如是供給十有餘年。忽一日辭去。云貧道在此撓漬多年。更無所酬。今有舊經一函。且寄宅中。一周年不回。即可開展。經歲餘開鎖。見有金數千兩。後賣一半。賈地造菩提寺。并建道林真身供養。至今像儀見存。薛甲今見有孫禹賓。在桂林效職。桂林風土記

鹿虎二禪師

唐鹿虎二禪師。寓居橫之寶華山寺。修行有道。聚徒甚眾。一僧騎花虎。一僧騎白鹿。往來山間。人常見之。南寧府志

慈明禪師

慈明禪師姓李。名楚圓。全州平塘人。神悟迥異。祥符二年出家。受具攝衣游方。遍參知識。天禧間入洛中。訪汾陽昭禪師。昭令造丈室。一言契悟。洞徹心源。七年辭去。昭因謂曰。子之法器。吾已久知。吾在首山。親證三昧。研窮的要。今付於汝。汝善護持。宜往南方。大興吾教。師受囑已。徑造筠州洞山寶禪師法席。終日壁坐。寶問達摩九年。意旨如何。師曰。空腹空心。翌日寶升座。推為導首。內翰楊大年。駙馬都尉李道勉。皆與師為方外交。後詔師入內。同觀渭川圖。仁宗問能詩否。師曰。那箇箇頭一撮山河。

年寫入畫圖間。依稀似我湘源景。只少虞妃淚竹斑。上悅賜紫衣號慈明大師。桂林府志

乘廣

楊岐乘廣者。容州人。張氏子。七歲學書。十三慕道。至衡陽。依天柱。入洛謁荷澤。會契真乘。由是南反。中經楊岐。一見峰巒。賞其奇秀。謂可開築。遂成道場。踰嶺以北。涉湘而南。法侶望山如趨。鷲嶺通志。

僧契嵩

明教契嵩禪師。字仲靈。藤州鐔津李氏子也。七歲出家。既受具。嘗戴觀音像誦其名號。一日千萬聲。經傳雜書靡不博究。得法洞山聰公。明道間。從豫章西山歐陽氏昉。借其家藏之書。讀於奉聖院。遂以佛五戒十善通儒之五常。著為原教篇。是時歐陽文忠公慕韓昌黎排佛。盱江李泰伯亦其流。嵩乃携所業三謁泰伯。以儒釋昭合。且抗其說。李愛其文之高。理之勝。因致書舉嵩於歐陽。既而居杭之靈隱。撰正宗記。定祖圖。齋往京師。經開封府投狀。府尹王公素仲儀以劄子進之。曰。臣今有杭州靈隱寺僧契嵩。經臣陳狀。稱禪門傳法祖宗。未甚分明。教門淺學。各執傳記。古今多有爭競。故討論大藏。備得禪門祖宗本末。因刪繁撮要。撰成傳法正宗記一十二卷。並畫

祖圖一面以正傳記謬誤。兼助輔教篇印本一部三卷上陛下書一封。並不干求恩澤。乞臣繳進。臣於釋教粗曾留心。觀其筆削註述。故非臆論。頗亦精緻。陛下萬幾之暇。深得法樂。願賜聖覽。如有可采。乞降中書看詳。特與編入大藏目錄。取進止。仁廟覽其書。奇其奏。勅送中書丞相韓魏公。參政歐陽文忠公。相與觀歎。探經考證。既無訛謬。於是朝廷旌以明教大師。賜書入藏中書。劄子有曰。權知開封府王素奏杭州靈隱寺僧契嵩撰成傳法正宗記。并輔教編三卷。宜令傳法院於藏經收附。傳法院准此。由是名振海內。已而東還。屬蔡公襄為守。延置佛日山。居數年。退老於靈隱永安精舍。熙寧五年。示寂。葬於永安之左。

僧念常佛祖通載

吾友契嵩師。熙寧四年。沒於餘杭靈隱山翠微堂。人莫訖。不壞者五物。晴舌鼻及耳毫數珠。時恐厚誣。以烈火重鍛。鍛之愈堅。嵩之文。僅參韓柳間。治平中。以所著書曰輔教編。携詣闕下。大學者若令首揆王相。歐陽諸巨公。皆低聲以禮焉。王仲儀公素為京尹。持上殿。以其編進呈。許附教藏。賜號明教大師。嵩童體完潔。至死不犯火訖。根器不壞。此即可高天下之士。余昔怪其累夕講談。音若清磬。未嘗少頃。乃終方得其驗。嵩字仲靈。藤州人。詩類老杜。楊公濟蟠收全集。公濟深仗其才。答嵩詩有千年

猶可照吳邦之句。

僧丈陸湘山野錄

僧行瑛

開先行瑛。桂州永福人。毛氏子。受業本州之菩提寺。長即出遊。至吉州隆慶院。謁慶閑。多所開悟。次參昭覺。頓息諸疑。出世廬山之開先。瑛材器廣大。果於立事。任人役物。如轉石於千仞之溪。無不如意。有昭覺遺風。在開先幾二十年。初苦痰癖。屢求去未得。卧病者三年。一旦起。將梵剎鼎新之。九年乃成。見者駭歎。黃太史曾直。嘗戲謂瑛為如來藏中之說客。菩提場中之遊俠云。永福志

僧洪

洪禪師。宋時人。少持齋。好誦諸釋家言。每焚香讀經。善念修持。寓崇善寺中。結廬以居。正體危坐。如泥塑人。竟日不飲食。鄉有好善者。每以衣糧助之。壽九十。尸解而去。

南寧府志

起信

定慧起信者。桂州人。性敏悟。師事琅琊覺。說法於蘇州之定慧院。為覺嫡嗣。通志

法演

法演。桂州人。志慕真乘。久無所得。一聞黃龍慧南風旨。玄峻。演曰。真吾師也。遂去事南。因紹其法。後以大衆推主。蘄州四祖山法席。通志

僧奉忠

冷齋夜話云。章子厚謫海康。過貴州南山寺。寺有老僧。名奉忠。蜀人也。自眉山來。欲渡海。見東坡不及。因病於此寺。子厚宿山中。邀與飲。忠忻然從之。又以蒸蛻勸食之。忠舉筋噉之。無所疑。子厚笑曰。奉佛戒。乃食蒸蛻。何哉。忠曰。相公愛人。以德。何必見誚。已而倚檻看層雲。子厚曰。夏雲多奇峰。真善比類。忠曰。曾記夏雲詩甚奇。子厚使誦之。忠曰。如峰如火。復如綿。飛過微陰落檻前。大地生靈。乾欲死。不成霖雨漫遮天。胡仔漁隱叢話

佛日禪師

佛日禪師。來賓縣金華峰第一代祖。有戒行。宋紹興中。於獅子山文殊菴端坐而逝。留偈云。落落拓拓。上無把捉。出沒太虛。無繫無縛。鐵馬倒地。誰人摸索。一統志

善資禪師

善資禪師。桂人。住寧壽寺。上堂有僧問。如何是廣南境。云。地連南嶽千峰秀。水接西

川一派清。如何是境中人。云腰間曾墜石。境上本無塵。問上宗來事若何。云一棒一痕分痛痒。獨許泥牛木馬知。又問如何是祖師西來意。師以手反覆示之。僧云。不會。師云。若喻此。如鴉啄鐵牛。無下口處。桂林府志

善慶

僧善慶。宋時清涼寺僧也。勤戒行。得悟常遊富川大小洞天。卒不見人。以為羽化云。通志

僧景淳

僧景淳。桂人工詩。規模淵源出於與可。元豐初居豫章乾明寺。終日閉門不置侍者。聞鄰寺齋鐘即造焉。諸刹皆敬愛之。或陰雨為送食。二十年如一日。淳詩意艱深。不可遽解。如夜色中旬後。虛堂第幾更。隔溪猿不叫。當檻月初生。又後夜客來稀。幽齋獨掩扉。月中無傍立。草際一螢飛。之類是也。桂林府志

紫衣禪師

能仁者。宋賜號曰紫衣禪師。初悟道。居勝金山。後因建能仁寺。明正德末移寺於全州南岸。通志

桂林老僧

樂平向十郎者。為商。往來湖廣諸郡。嘗販薑。每數十篋。之桂林。值久雨。憩僧寺中。天乍晴。悉出。薑曝於庭。俄一人。儒衣。入門相揖。問勞委曲。如舊交。良久。率爾言曰。君之此物。能捐十之一。見贈乎。向笑曰。鄙人不遠數千里來貿易。以覲錙銖之息。歸養妻孥。不幸困於雨。進退無計。君何為出此言。且素昧平生。何緣損已以相餽。豈故相戲邪。其人卑躬下氣。求之不已。向大怒。極口詆之。則熟視微笑而去。少頃。所曝薑皆變白色。欲腐。向驚疑莫測。一僧在旁。密語之曰。此子精於南法。非特能變幻百物。亦能害人。向愁慘泣曰。為之奈何。僧曰。吾知之久矣。見之孰矣。彼固不敢犯我。然以其挾妖欺天。害人以自利。心惡之。今知客反掌受禍。詎宜忍不言。此子技至精。儕輩莫及。獨此東去十里外。有老僧能制之。而其居隱邃。人所不識。客誠能虔心求訪。盡力哀祈。當轉禍為福。不然。無濟也。向拜謝如教。亟往訪之。則荒榛蔽目。絕無人迹。蕭然一草舍。不蔽風雨。老僧情騰。獨坐。向趨拜致敬。跪以情白。拒之甚堅。曰。吾厭苦世紛。屏迹待盡。安有所謂道術哉。且何人饒舌。為汝道。向洒涕悲鳴。拜以百數。乃首肯。呼入室。取丹書小符一紙。付之曰。汝歸就曝處。以大釘釘之。勿令盡。彼若來悔伏。則取而

縱之向婦用其說。未瞬息間。黃色如故。秀才者復來。遍體腫脹。氣息纔屬。令二僕扶持。蹣跚悔謝曰。昨聊與客戲爾。何至是。所携貨既無傷。幸舍我。向為去釘。其人漸平。復如初。鄭重而出。別有告者。彼非真感君賜也。業已相負。罽隙既成。必謀報怨。將何以待之。向益懼。又奔詣老僧。僧曰。若果爾。宜重釘此符。令沒入地。除妖以寧一方。吾之志也。向謹奉教。符纔沒地。外間爭相傳告云。秀才暴卒矣。是事本吾邑向元伯侍郎黨所致。而鄉人皆不知。後聞何德揚始言之。志 夸堅

盧德洪

張自明。寓京時。有一僧來謁曰。余姓盧名德洪。宜州廣化寺僧。聞君任吾州。故來謁。遂留談。授一履而去。云至宜。以此履覓我。自明至宜。遊南山。問德洪所在。眾僧愕然。云。本僧別去。不知所向久矣。自明焚香祝曰。汝有靈。以香引我。已而香拂山左右室中。往觀之。有竅。燈猶微明。德洪坐化於內。一履在前。與所遺無二。始知其異云。西事

齊曉

齊曉。桂州人。碧蘭坊蕭氏子。依護國寺出家。既具戒。游湖湘。依雲峰悅禪師數年。悅謝世。乃渡江游祖山。愛黃梅小招提。葺為香火之社。邂逅楊次公與語。針芥相投。叙

雲峰錄行於世。既南還。舊隱道俗參和者常數百人。繼住寧壽寺。風規凜然。復還護國寺。臨終之日。四眾圍繞。至中夜轟一喝。眾急趨之。已撼不應矣。危坐三日。儀采不變。瞻禮者踵武不絕。桂林府志

僧圭

宋鹿苑圭者。桂州人。嗣德山遠開法於潭州之鹿苑寺。通志

紹慈

萬杉紹慈。桂州人。趙氏子。年十九。振策踰衡嶽。抵豫章。觀馬祖遺跡。聞廬山東林常總道席甚盛。遂委心焉。一日語次。總舉拂子。擊慈者再。慈遽奪拂子。總云。汝何敢爾。對曰。拂子今屬慈矣。總云。三十年老將。今被小卒摧折。自此聲名籍甚。推為東林上首。隨出世。通志

慧初

德山慧初。靜江府人。初見善財廣參事。奮衣而起。遂浮湘而下。徧經東南。所至諮詢名宿。少所降挹。乃見黃龍震言下契。合因得嗣其法。主常德之德山。通志

烏焚僧

鳥焚傳正統間住衡山雁峰寺過全州謁無量禪師遂至懷集寓蓮花巖內年九十餘洞氓日施蔬食天順改元冬天火降洞僧移蒲團巖外坐化未幾飛鳥萬計集聚蔽日各摘羽覆之一日如墓二日如廩三日如丘陵有一鳥大如鶴摘毫俱盡赤肉啼於巖壁既旬日枯茅叢中火起燃及羽堆此鳥墜火與僧同焚後有人見一小兒騎一長尾鳥飛向護山絕頂而沒全州志

爽菴真者

爽菴真者得一切觀智遠遊匿跡或有問其里姓但曰廣西人以故不知何州縣問所師授搖首不答有固問者但云吾師觀世音而已去就無常莫知其所終通志

融虛

融虛禪師名真宗四川重慶府合州定遠縣人壯年雲遊至永明心見信得上乘之禪宗篤志修行悟不二之妙法首闢湘山寺大振宗風人咸欽之及化身日諸僧誦經舉火弟子如果見火化至胸猶諷大乘經不息遂叩師曰乞留遺衣鉢以示後人師始擲魚子下壇瞑目坐化年八十有奇時崇禎甲戌也永福志

粵西叢載卷十三

蘇娥詐寃

清 汪森編

漢九江何敞為交州刺史行部到蒼梧郡高安縣暮宿鵲奔亭夜猶未半有一女從樓下出呼曰妾姓蘇名娥字始珠本居廣信縣修里人早失父母又無兄弟嫁與同縣施氏薄命夫死有雜繒帛百二十匹及婢一人名致富妾孤窮羸弱不能自振欲之傍縣賣繒從同縣男子王伯賃車牛一乘直錢萬二千載妾并繒令致富執轡乃以前年四月十日到此亭外於時日已向暮行人斷絕不敢復進因即留止致富暴得腹痛妾之亭長舍乞漿取火亭長龔壽操戈持戟來至車旁問妾曰夫人從何所來車上所載何物丈夫安在何故獨行妾應曰何勞問之壽因持妾臂曰少年愛有色冀可樂也妾懼怖不從壽即持刀刺脅下一創立死又刺致富亦死壽掘樓下合埋妾在下婢在上取財物去殺牛燒車車杠及牛骨貯亭東空井中妾既死痛感皇天無所告訴故來自歸於明使君敞曰今欲發出汝屍以何為驗女曰妾上下著白衣青絲履猶未朽也願訪鄉里以骸骨歸死夫掘之果然敞乃馳還遣吏捕捉拷

問具服下廣信縣驗問與娥語合壽父母兄弟悉捕繫獄敬表壽常律殺人不至族誅然壽為惡首隱密數年王法自所不免令鬼神訴者千載無一請皆斬之以明鬼神以助陰誅上報聽之千寶記

扶南王

扶南王范文本夸奴牧羊山澗水中得二鱧魚規欲私食即知檢求文曰非魚也將礪石還爾即至魚所見是石遂去文異之石有鐵文就山中治鐵鍛作兩刀舉刀向郭祝曰鱧魚變化治石成刀斫石郭破者文當治此國遂斫之石破於是人情附之後王扶南石上痕尚在魚刀子孫寶守謬比之斬蛇劍橋南瑣記

飛蟲食屍

蒼梧吏劉京云桂林晉興寧浦間人病將死有飛蟲大如小麥或云有甲或一石餘或三五斗而來在舍上人氣絕來食亡者雖撲殺來如風雨不可斷止斯須肌肉都盡止餘骨在乃去殯殮不時皆受此害有物力者以衣服布帛五六重裹亡者此蟲畏梓木氣若以梓木板障其傍并以作器便不敢近博物志

虞蕩射麋